

1. januar 2018-miit atuutilersumik inatsisinut nalunaarutit atuutsinneqalernissaannut Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Peter Olsen, Inuit Ataqatigiit)

Akissuteqaat

(Naalakkersuisut Siulittaasuut)

1. Siullermeerneqarnera

Naalakkersuisut aallaqqaasiullugu Inatsisartunut ilaasortaq Peter Olsen, Inuit Ataqatigiit, aalajangiiffigisassatut siunnersuutaanut qutsavigaat.

Aalajangiiffigisassatut siunnersuut pissutissaqalersitsivoq oqaatigissallugu inatsisinut nalunaarutit pillugit apeqqut 2016-imi § 37 malillugu apeqqutinik marlunnik akissuteqarnermut atatillugu Naalakkersuisunit siusinnerusukkut suliarineqartarsimmamata.

§ 37 malillugu apeqqutinut taaneqartunut akissutigineqarsimasuni takuneqarsinnaasutut Naalakkersuisut inatsisinut nalunaarutinngorlugit pisortatigoortumik inatsisinik eqikkaasalernissaq aallaaviatigut ajoriffissaqartinnigilaat.

Taamaakkaluartoq inatsisinut nalunaaruteqalernissaq pisariungaatsiartussaavoq taamatullu ingerlaaseqarnissaq aallartinneqalersinnagu pisariaqartinneqartunik eqqarsaatersuutigineqaaqartariaqarluni. Tamanna pissutissaqalersitsivoq eqqaasitsissutigissallugu siusinnerusukkut Naalakkersuisuusimasut eqqarsaatersuutigisimagaluarmassuk inatsisinut nalunaarutit atorneqalissasut. Sulisunik inuttassaaleqinermik pissuteqartumik taamaaliorniarneq aallartinneqanngitsoorsimavoq tamannalu ullumikkut suli unammilligassaalluni.

Namminersornerullutik Oqartussat aallartimmatali nunatsinni inatsisinik kalaallisuumut nutserinerit nutserisunit assigiinningsorpassuarnik suliarineqartarsimapput. Taamaalillutik nutsikkat ukiut ingerlanerini taamatullu sumiorpaluutit assigiinningsutaasigut assigiinnngiaarsinnaasarpur, tamakku takuneqarsinnaasarlutik assersuutigalugu pingaarnertut inatsisit kingusinnerusukkullu inatsimmik allanngortitsinerit assigiinnngiaartunik nutserneqartarnerisigut.

Inatsisinik eqikkaasoqartillugu inatsisini ataasiakkaani inatsisip oqaasertai maleqqissaarlugit inatsimmut nalunaarummi ataatsimoortumi issuarneqartassapput. Assigiinnngiaartunik nutsikkat taamaalillutik kalaallisut eqikkaanerni oqaasertamikkut assigiinnngiaarsinnaapput, qanoq paasinninnissamut tunngatillugu ajornartorsutinik kinguneqartumik. Taamaammat inatsisinik eqikkaaneq inatsisitigut isumannaannerulernermik kinguneqassanersoq qularnarpoq.

Tamakku saniatigut eqqarsaatigineqartunut ilanngutissallugu pingaaruteqarpoq inatsisinik eqikkaanerup taannaannaalluni pinngitsoorani malitassanngortitaannginnissaa. Tamanna isumaqarpoq assersuutigalugu inatsisinik eqikkaanermi kukkuneq inatsisitigut pissutsinik allanngortitsissanngimmat, tassami inatsisartut inatsisaat atuuttut, pingaarnertut inatsisit

taamatullu inatsisit allannguutaat, inatsiseqartitsiviusuni pineqartuni inatsisitigut inissisimanernut aalajangiisuusussat.

Kisiannili assigiinngiiaartunik nutserineq qanoq paasinninnissamut tunngatillugu assigiinngissutsinik kinguneqartillugu, taamaalilluni innuttaasoq assersuutigalugu inatsisinik eqikkaanermut tatiginnilluni iliuuseqareerluni ajoqutissarsippat aningaasanilluunniit annaasaqarluni, pisortat tamatumunnga kukkusumik ilitsersuisimanertulli akisussaatinneqarsinnaapput.

Taamaammat inatsisinik eqikkaaneq annertuunik unammilligassartaqarpoq inatsisinullu nalunaarutit atugaalernerat suliamik ilisimasalinnik sulisussanillu pisariaqartinneqartunik soqarani inatsisitigut isumannaatsuunissamut tunngatillugu ajornartorsiutinik kinguneqarsinnaavoq.

Paatsuugasoqaleqqunagu Naalakkersuisut eqqaasitsissutigissavaattaq Naalakkersuisut 2008-imi nittartagaq www.lovgivning.gl pilersinnikummassuk. Nittartakkami tassani Namminersorlutik Oqartussat inatsisaat ingerlaavartumik tamanit iserfigineqarsinnaalerput, piareersarnernut, allanngortitsinernut taamatullu nalunaarutitut, inatsimmik tunngaveqarluni atuuttussanngortitanut, pisariitsumik iserfigineqarsinnaallutik.

Tamakku saniatigut Statsministeeriaqarfiup Kalaallit Nunaanni Inatsisinik nalunaarsuiffiit nutartikkat sularisarpai taamatuttaaq www.lovgivning.gl aqutigalugu pissarsiarineqarsinnaasut. Nalunaarutini ajornanngitsumik paasiuminartumillu takuneqarsinnaapput inatsisit suut suliassaqaqarfinnut tiguneqareersunut tiguneqarsimannigitsunullu atuunnersut.

Naalakkersuisut www.inatsisit.gl. aqutigalugu inatsisit, nalunaarutit allallu akuersissutigineqarsimasut ingerlaavartumik tamanut saqqummiuttaannassamaarpat.

Naalakkersuisut aamma inassutigaat, inatsisinut nalunaarusiornermi aningaasaqarnikkut inatsisitigullu isumannaatsuunissamut ajornartorsiutitut taaneqartunut naammaginartumik aaqqiissuteqarluni ilanngussinissamut suli periarfissaqarmat.

Naalakkersuisut taamatut oqaaseqarlutik aalajangiiffigisassatut siunnersuut itigartinneqassasoq inassutigaat.